



INTRODUCZIUN

DA FLURINA CAVEGN-TOMASCHETT

Davart Giusep, il bab nutriver da Jesus, uдин nus buca savens els texts biblics. El ei il quiet e met accumpigner da Maria. Quest evangeli raqueta dil siemi da Giusep e dat aschia perdetga, co era el ei staus pertuccaus dalla sort da Maria. Per el ei la situaziun buca stada semplia, segiramein eis el staus mudergiaus da bia damondas e profunds dubis.

Aschia sco tier Maria, ha Dieus era tarmess tier Giusep in aunghel cun in messadi pil futur. Auter che tier Maria cumpara quei aunghel denton el siemi. Igl aunghel da Giusep vegn era buca numnaus cun num. Tuttina ei era quella scuntrada da gronda impurtonza: Ella pren la tema da Giusep e dat ad el curascha da dir GIE a quei che Dieus ha previu cun el. Tut quei ei buca sempel da capir. Ils fatgs vegnan daveras avon sco en in siemi.

EVANGELI

Mt 1,18–24

¹⁸Cun la naschientscha da Jesus eis ei stau aschia: Cura che Maria, sia mumma, era s'empermessa cun Giusep, eis ei semussau gia avon ch'els vegnien ensemen ch'ella era purtonta entras il Spert sogn.

¹⁹Mo Giusep, siu um, ch'era gests e leva buca metter ella en zanur, patertgava da relaschar ella discusamein. ²⁰Ferton ch'el ponderava quei, ei in aunghel dil Segner cumparius ad el en siemi ed ha detg: Giusep, fegl da David, buca tema da prender tier tei Maria, tia dunna, pertgei quei ch'ei schendrau enten ella, deriva dil Spert sogn. ²¹Ella vegn a parturir in fegl e ti dueis metter num Jesus ad el, pertgei el vegn a spindrar siu pievel dils puccaus. ²²Tut quei ei daventau, per ch'il plaid dil Segner secumpleini. Pertgei il Segner ha plidau tras il profet:

²³Uarda, la giuvna vegn a concepir e parturir in fegl,
ed ins vegn a dar num ad el «Immanuel»,
quei vul dir: Dieus cun nus.

²⁴Cura che Giusep ei sedestadaus ha el fatg sco igl aunghel dil Segner veva cumandau ad el ed ha priu sia dunna tier el.